



AWEMAINTA YEN ALEGRIA CU RUTHY



Temporada di vakantie

Skirbi pa Ruthy "Lady Ruth" Vrieswijk-Bergen

TIN cu ta bay den exterior, tin cu ta keda aki mes riba nan dushi pida baranca y ta disfruta di e.o. nos lama nan blauw cristalino. Hasta ami como domestic engineer a tuma un break, si, un break den mi skirbimento di relatonan positivo cu ta inspira e curasonnan un crenchi. Nos a pasa hopi pero hopi dushi mes den e temporada di FIFA su campeonato mundial di futbol cu ta trai lomba. Nos a bishita nos fabuloso Bon Bini Festival y tabatin e privilegio y bendicion di por a recita un di mi bunita poemanan na papiamento y Ingles pa e turistanan cu ta bishita nos Bon Bini Festival, asina gezellig den Fort Zoutman Willem III toren, ta manera hincaden un cocolishi grandi cu ta luci cu su bunita bailenan, musica, dushi cuminda, obranan di man etc. ... Turistanan a toca mi curason ora nan a bisa'mi cu mi ta papia palabranan yen di sabiduria hunto cu mi poema cu a impacta. Muchanan cu a bai e.o. Hospi Bondi Camp of un otro campamento sigur a pasa bon !! Mayornan cu a tene nan yiunan bezig na cas mes, cu cosnan leuk, bay cinema of cana den parke nacional Arikok. Djis pa menciona algun di e hopi cosnan leuk cu por haci aki mes, banda di tur e deportenan. Mi casa cu mi tambe ta canando atrobe, como parti di nos ehercicio pa e condicion fisico keda bon tambe. Ah si, pabien na tur e muchanan cu a bay over, cu a slaag y cu ta bay sigui studia na Hulanda, Merca of Costa Rica of na un otro pais. Tin cu ta scoge pa keda mas cerca di cas y ta bay studia na nos ruman isla Cor-

sou. Nos tur ta sigui crece y bira grandi, hasta dos cabey shinishi blanco mas mi a haya atrobe, hahahaha, ta ken ta conta nan ?? Nos isla a sinti e dolor di e famianan cu a perde un of mas ser ker den e avion MH17 di Malaysia Airlines cu a wordo tira abao intencionalmente of no intencionalmente, cosnan cu sa bay den doofpot lamentablemente. Tin cosnan mahos y doloroso ta pasa den paisnan leu for di nos baranca tan stima cu ta pone tur hende pensa riba e balor di bida pa nan mes. Y aunke niun hende kier pa otro mete den nan cas, locual por haci ta resa, sigui resa pa e.o. paz mundial. Ban pensa na e bondadnan di Mama Teresa, na e 10 mandamento nan di Dios y na nos mes, kico nos ta haci dia pa dia pa bira un miho hende cu mas curason, mas comprension, mas tolerancia y mas amor. Tin biaha bo no sa mas cua emisora radial bo scucha. Di sorpresa mi a cuminsa scucha Fresh FM 104.3 y ta sinti vibracionnan di positivismo y alegria, intercambio cu nan noticieronan informativo na Hulandes. E ta haci mi corda Radio Kelkboom un crenchi, cu ya ta historia, pero keto bay den hopi oyentenan nan memoria. Mi ta laga mi relato di awe te akinan, pa no spanta lectornan cu mucho hopi palabra, palabranan cu tin bida den nan, ora nos para keto un rato y reflexiona. Y pa por cuminsa custuma un crenchi atrobe cu Lady Ruth su estilo di skirbi y expresa, liber for di su humilde curason yen di gradicimento pa cada dia di nobo cu oportunitadnan nobo, lesnan nobo. Nos

ta dorna e relato cu un par di potret cu colega amiganan den prensa por publica segun nan espacio atrobe dedica na Lady Ruth su fiel lectornan. Danki pa e bon comentarionan ricibi pa cu mi dos poemanan cu si a wordo manda pa publicacion durante Lady Ruth su "Vakantie, aki na Aruba mes". Nos no ta perfecto, pero lo sigui haci nos best pa comprende cosnan pasando rond di nos y segun e inspiracion nan ta bin, comparti esaki. Ta duel mi masha cu e corant "Arubawe" no a sobrevivi e stepping stonesnan nan dilanti of na nan banda, y keto bay mi ta tende comentario cu ta haya nan falta cu nan maneranan unico y special. Jammer, pero bida ta sigui. Awor por lesa e relatonan di Lady Ruth den Awe mainta y Diario, cu nan tremendo cooperacion di nan curason profesional. Asina nos por sigui complace tur lectornan aki na Aruba.

